

# Chłop za czerownicã



TÓMK FÓPKA

Jadã sobie z robòtë autòfã. Kãsk mie sã spieszi, a tu jaczis zótw przegrzeszony, jakòs spiacò pònarwa, mgleja jedna jedze i jedze... i jedze... Widama dajã znac. Nick. Pòtrãbiwóm. Nick. Mëszlã, co za baba jedna! Zbiéróm sã w se i dajã gazu. Mijóm autól i widzã co? Za kòlã czeru sedzy niedzelny czerowca – chłop. Sedzy? Nié. Òn sã ti czerownicë trzimò tak, jakbë mù miała za sztót wëlecec w kòsmòs! Midzë nim a autòłowã rutã ledwò przecyskajã sã atomë léftu. A do te jesz ta kòzëchòwò mùca wësokò pòd dak... Zawiatëjã sã, ze nie òdkrił jesz piãtégò biegù i na zacygniãtim rãcznym jadze... Terò żebë leno nie zmienilë widów na krzëżòwce... Mòtór mù zgasnie na 100%. Tej nigle gò nazòd zapòli, wid sã zòs zmieni na czerwòny... A tã stojisz i... sã mòdlisz. I klniesz. I zãbama szrewòcesz... Marija Józefie! Co to za búcëskò! Jezës Maria! Jak jò mù jednegò ùlnã... Matkò Bòskò! Jedzë, chłopie, bò mie zarò dekel wësadzy... Same strzelisté aktë... Wiara i górz w jednym.

Cekawé, czë jak ksãdz jedze za taczim, téz przeklinò? Kò ksãza téz autòlë majã i to jaczë... Tej nekò taczì ksãdz spòd, dòjmë na to, Czelnã jaczim mercã z òstatnã pòslugã, a tu mù taczë czëstocenkò wëjedze... Nie zabluźni òn? Pò statk do kropieniò

nie sygnie? Nié. Stateczno zmówi zdrowaszka, òjczenasza i cos do sw. Tónë przed wëprzedzanim...

Co jinégò ten, co TIR-ã sënne. Òn rządzì na drodze. Jegò zëwiszczã je: „nastãp sã”. Kòzdi mù zlòzo z drodżi. Gòdajã na nich przekãсно „scërze”, bò w bødze spìã i na kòlã lejã... Ti z wiòldżich autòłów majã lepi. Ni mùszã òpasowac na mniejszich, co piechti lézã bøkã abò slòdë sã wlekã. Òbczapiã, òpriszczã a jesz sã z te ùsmiejã... A jak drodżi niszczã... A jak flot gnajã... W całòscë òb cemnicã... Jak bødowelë gduńszci stadión – nìcht na drogach w gminie Szemùd, Lëniò czë Żukòwò nie znòl dnia ani gòdzënë...

Jesz jiny sã czerowcowie autobusów. Tëch jidze pòdzielc na: gimbusowëch, lëniowëch i turisticznëch.

Gimbüsë jeżdżã na mòlëch trasach, dosc òstròżno, bò wierzã szkòlowé dzecë. Kòmùnycakjò pùblicznò – lëniowò mò ju specjalné rãczci do ùchwëceniò, cobë przë òstrim hamòwaniem nie wëpadnãc przez rutã. Tuwò ten, co sedzy za kòlã czeru, mùszì rozmiòc robic wiele rzeczi naròz: zmiëniac biedzi, krãcëc czerownicã, deptac pindalë, slëchac radia, jesc sztòlã ze sërã, pòzërac, czë kògò dwierzama nie przëklëszczil, sprzedawac biletë i merkac, czë jakò òfiara czasã nie biegò za autobusã...

Ti „turisticzny” sã z jinégò swiata. Majã szituz i mòlã kuchniã w swòjim wòzu naròz. Mògã rozmajité filmë pùszczac... To sã ne nòdlëgszë trasë. Czerowca, co wierzë turistów, colemało mò jedzenië òb drogã darmòk, sygnie, że przëwieze do gòscyńca swòjich pasażérów...

Jesz na drogach jidze pòtkac profesorów i artistów. Ti pierszi pòtrafiã zgùbic swòje autkò na parkingù a ti

drëdżi – nalòc benzinë do dizla... Je téz apartné „towarzëstwò zëmnégò lokca”. Jeżdżã gòlfama, mòcno gazëjã a lokce wëstòwiajã za òkno. Uczëc jich jidze z daleka. To je taczë: òmpa, òmpa, òmpa... abò bóms, bóms, bóms – to zalezi òd te, jaczi „meloman” tam sedzy.

Sã ti, co jeżdżã bmw i czasã audi. Jinaczi to je trzë „-óra”: skóra, fóra i kòmóra. Jich nòbarzi lubiã młòdë dzëwczãta ze wsë, nie wiedzec czemù zwónë „blacharama”.

Mercoma jadã wòzny: prezesowie, dyrektorowie a jiny, co lubiã, cobë jima czòpkòwac. Niechtërnë bialczy gòdajã, że wiòlgòscã autòfã chłopi nadgòniwajã jinë swòje małoscë...

Chłopi abò baro dbadżã, abò dbadżã, abò mało dbadżã – ò swòje sztëre kòlã. Ti pierszi, pedancë, wnetka codzënno mëjã blachã, léftu dopapòwiwajã a szczoteczka do zãbów bënë czëszczã. Jakbë sã dało – z autòfã bë taczì familiã załožil... Tëch drëdżich je nòwiãcy – prosto lejã do bakù i jeżdżã. Òd swiata ùmëjã. Ti trzeci sã nielusnikama. Z taczim nìcht sã òb drogã nie zabierze. Nòprzòdka bë mùszòl szópã przez gòdzënë wëgarinac ne wszët-czë smiecëska, bødle a kwitë za zlé parkòwanië... Òni czãsto dzi-pi-esów ùziwajã, bò przez szibë nick ni ma widzec...

Chłop mùszì miec maszinã dlò niégò zrobionã. Do jachaniò. Czedë tej-sej przesadnie sã do autòlka swòji bialczy, zdòrzò sã, że wërwie ze scanë pas, zdrzadelka mù nié do òczów pasëjã (bialczy je majã do malowaniò mùnków) a czësto nie wié, docze mù je nót tëlì ròznëch schòwków...

Mòze temù, żebë chłopi sã mielë dze schòwac...